

आकाशवाणी

खास-खास खबरां:-

- संसद दे दौनें सदनें च अज्ज राष्ट्रपति हुंदे अभिभाषण पर धन्नवाद प्रस्ताव पर चर्चा जारी राहग। लोकसभा दे कार्यक्रम च 2026-27 दे प्रस्तावित बजट पर बी चर्चा दी बी वबस्था रखी गेदी ऐ।
- केन्द्री सहकारिता मंत्री अमित शाह अज्ज भारत दे पैहले सहकारिता राइड हेलिंग मंच “भारत टैक्सी” दी शुरुआत करगंन।
- 12मीं मणिपुर विधान सभा दा 7मां इजलास अज्ज शुरु होआ'रदा ऐ। कल उत्थे राष्ट्रपति राज खत्म करियै बी.जे.पी दे युम्नाम खेमचंद होरें गी मुखमंत्री दे रुपे च सगंध चुकाई गेई ही।
- विदेशमंत्री डाक्टर एस. जयशंकर होरें बिरले खनिजें सरबंधी चुनौतियें गी खत्म करने ते इंदी सुरक्षित सप्लाई चेन लेई अंतराष्ट्रीय सहयोग पर जोर दिता ऐ।
- महिला प्रीमियर लीग दा खताबी मैच अज्ज दिल्ली कैपिटलस ते रॉयल चैलेंजर्स बेंगलुरु दियां टीमां होगंन आमने-सामने।
- दुनिया दियें प्रमुख प्लास्टिक नमैशें चा इक “Plast India-2026” अज्ज नमीं दिल्ली च शुरु होआ रदी ऐ- जेहदे च दुनिया भरै थमां 2000 कोला मतियां कम्पनियां हिस्सा लै'रदियां न।
- ते मौसम विभाग नै अज्ज उत्तर-भारत दे केई राज्यें च घनी धुंध दे आसार दस्से न।

<><><><><><>

Parliament

लोक सभा च अज्ज राष्ट्रपति हुंदे अभिभाषण पर धन्नवाद प्रस्ताव पर चर्चा गी परतियै शुरु कीता जाहग। एहदे इलावा सदन दे कार्यक्रम दे मताबक अज्ज एहदे इलावा 2026-27 आहले आम बजट पर चर्चा गी बी सदन दे कम्में दी सूचि च रखेया गेदा ऐ। तौंआई राज्यसभा च बी अज्ज धन्नवाद प्रस्ताव पर चर्चा गी जारी रखने दा कार्यक्रम ऐ।

<><><><><><>

Shah -Bharat Taxi

केन्द्री सहकारिता मंत्री अमित शाह होर अज्ज नमीं दिल्ली च भारत दे पैहले सहकारी राइड हेलिंग प्लेटफार्म “भारत टैक्सी” दी शुरुआत करगंन। एह पैहल सहकारी क्षेत्र गी मजबूत करने दे मुख्य भरै च समावेशी ते नागरिक केन्द्रित ट्रांस्पोर्ट गी बढ़ावा देने दी दिशा च इक महत्वपूर्ण गेंस साबत होग। सहकारिता मंत्रालय नै आखेया ऐ जे एह प्लेटफार्म सारथी आक्खे जाने आहले ड्राइवरें गी मिलकियत- संचालन ते भाह तैह करने दे केन्द्र च रखोग। “भारती टैक्सी” विजन कुसै कमीशन दे ते विजन कुसै बाद्दू शुल्क दे रेट तैह करने आहले इक मॉडल दे रुपै च कम्म करोग- जेहदे नै टैक्सी चलाने आहलें गी सिद्धा-सिद्धा फैयदा पुज्जोग। मंत्रालय नै दस्सेया ऐ जे भारत टैक्सी सेहत बीमा- दुर्घटना बीमा- रटैरमेंट बचत ते इक समपर्त चालक सहायता प्रणाली राएं समाजी सुरक्षा प्रदान करोग। उ'नें दस्सेया जे बाइक दीदी नां दी पैहल- बी लागू कीती जा रदी ऐ- जेहदे तैहत अजें धोड़ी 150 कोला मतियां महिलां ड्राइवर “भारत टैक्सी” कन्नै जुड़ी चुकी दियां न।

<><><><><><>

Manipur

मणिपुर च राज्य विधानसभा दा 7मां सत्र अज्ज संजा 4 बजे शुरु होग। उत्थै राष्ट्रपति शासन खत्न करी दिता गया ऐ ते बी.जे.पी. दे युम्नाम खेमचंद सिंह होरें कल राज्य दे मुखमंत्री दे रुपै च संगंध चुक्की। एहदे शा पैहले गृह मंत्रालय आसेया इस सरबंधै च इक अधिसूचना जारी कीती ही। पिच्छले बरे 13 फरवरी गी उस बेल्लै दे मुखमंत्री एन.बीरेन सिंह हुंदे इस्तीफे दे बाद राज्य च राष्ट्रपति शासन लागू करियै- मार्च 2027 तगर दे कार्जकाल आहली मणिपुर विधानसभा गी मुअत्तल रखेया गया हा। शपथ गैहण समारोह इम्फाल दे लोक भवन च लग्गा- जित्थें राज्यपाल अजय कुमार भल्ला होरें खेमचंद होरें गी ओहदे ते राजदारी दी संगंध चुकाई। शपथ गैहण दे बाद उनें- संवाददाताएं गी सम्बोधित करदे होई आखेया जे 2047 तगर विकसित भारत दे लक्ष गी हासल करने च मणिपुर अहम भूमिका निभाग।

<><><><><><>

BJP -Prez Telangana

भारतीय जनता पार्टी दे अध्यक्ष नितिन गडरी होरें आखेया ऐ जे तेलंगाना दे मुखमंत्री रेवंत रेड्डी हुंदी अगुआई च कांग्रेस सरकार बंड पौने आहली नीति ते संतुष्टिकरण च लग्गी दी ऐ ते राज्य च हिंदू मंदर ते रिवायतें गी निशाना बना'रदी ऐ। नबीन हो'रें आखेया जे भारतीय जनता पार्टी नै सनातन धर्म ते हिंदू भावनाएं दी राक्खी दा संकल्प लैता ऐ। उ'नें पार्टी कारजकर्ताएं थमां मोदी सरकार दी नीतियें ते कांग्रेस सरकार दे झूठे वायदें खास करी महिलायें- करसानें ते वंचित समूदाय गी माली सहायता देने कन्नै सरबंधित झूठे वायदें दा जिक्र करदे होई व्यापक प्रचार करने दा आहवान कीता।

<><><><><><>

EAM -Critical Minerals

विदेशमंत्री डाक्टर एस. जयशंकर हो'रें बिरले खनिजें सरबंधि चनौतियें ते अंतराश्ट्रीय सहयोग कन्नै इन्नी सप्लाई चेन गी खतरामुक्त बनाने दी जरुरतें पर जोर दिता ऐ। जंदी रातीं वाशिंगटन डी.सी. च अमरीका दे विदेशमंत्री मार्को रुबियो हुंदे आसेया लोआए गेदे पैहले-पैहले महत्वपूर्ण खनिजें बारे मंत्री स्तर दे सम्मेलन गी सम्बोधित करदे होई डाक्टर जयशंकर हो'रें आखेया जे भारत इनें दुर्लभ खनिजें पर फोर्ज पैहल दा समर्थन करदा ऐ। एह सारी जानकारी उ'नें अपने इक सोशल मीडिया हैंडल पर सांझी कीती। उ'नें इत भेठा भारत दे जतनें गी बी उजागर कीता- जिंदे च राश्ट्रीय महत्वपूर्ण खनिज मिशन- रेअर अर्थ कारीडोर ते जिम्मेवार कारोबार जनेइयां पैहलकदमियां शामिल न। विदेशमंत्री हुंदा एह ब्यान अमरीका दे उपराश्ट्रपति जे.डी. वैंस हुंदे आसेया महत्वपूर्ण खनिजें बारे अंतराश्ट्रीय बजार गी नमां सरुप देने गितै किट्ठै रलियै कम्म करने लेई भ्याल मुख्खें गी साद्दा दिते जाने पर आया ऐ।

<><><><><><>

WPL

महिला क्रिकेट लीग दे फाईनल च अज्ज दिल्ली कैपिटल्स दा मकाबला रॉयल चैलेंजर्स बेंगलुरु कन्नै होग। वडोदरा दे बी.सी.ए स्टेडियम च एह मैच संजा साङ्डे 7 बजे थमां खेडेया जाग। बेंगलुरु कश दुई बारी एह खताब जितने दा मौका ऐ- जिसलै कि दिल्ली कैपिटल्स बी चौथी बारी फाईनल च पुज्जियै अपना पैहला खताब जितने दी ताहंग लेइयै मदान च उतरै करदी ऐ। इस बरे बी.सी.सी.आई नै इस प्रतियोगिता लेई कोई 10 करोड़ रपे दे इनाम दी घोषणा कीती दी ऐ।

<><><><><><>

Cricket

U-19 इक रोजा क्रिकेट विश्व कप सैमीफाइनल च भारत नै अफगानिस्तान गी 7 विकेटें कन्नै हराया। एह मैच जिम्बाब्वे दे Harare च होआ। हुन कल भारत दा मुकाबला इंग्लैंड कन्नै होग।

<><><><><><>

Trump

अमरीकी राष्ट्रपति डोनाल्ड ट्रम्प हो'रें अज्ज आखेया ऐ जे चीन दे राष्ट्रपति शीं जिंगपिन हुंदे कन्नै उं'दी फोन पर गल्लबात होई ऐ- जेहदे च बपार- सुरक्षा- ऊर्जा- भू-राजनीति सनें केई विषयें पर तफसीली विचार-बटांदरा कीता गया ऐ। उ'नें आखेया जे एहदे शा अगले त्रंऊ बरे लेई अमरीका -चीन सरबंधें गी होर अगड़े लेई जाने लेई सकारात्मक दिशा हासल होई ऐ। ट्रम्प हो'रें दस्सेया जे गल्लबात दौरान बपार- फौजी स्थिति- चीन ते ताइवान दी उं'दी अप्रैल महीने होने आहली यात्रा- रुस ते यूक्रेन बश्कार जारी लड़ाई- ईरान दी स्थिति ते दौनें देशें बश्कार ऊर्जा दे क्षेत्र च सहयोग बारे बी केई महत्वपूर्ण विचारें गी सांझा कीता गया ऐ।

<><><><><><>

Plast India Exhibition

दुनिया दियें प्रमुख प्लास्टिक नमैशें चा इक “प्लास्ट इंडिया 2026” अज्ज नमीं दिल्ली च शुरु होआ'रदी ऐ। रसैनें ते रसैनी हैलें सरबंधि मंत्रालय नै जानकारी दिती ऐ जे इस आयोजन च 2 जहार कोला मतियां अंतराष्ट्रीय कम्पनियें अपने नवाचारें दा प्रदर्शन करने लेई नमैश दा हिस्सा बना करदियां न। मंत्रालय नै आखेया ऐ जे एह आयोजन बपार- टैक्नॉलोजी- प्रतिभा- समर्थ ते सैलसफा दे रणनीतिक आधार थम्बें पर केन्द्रित होग। मंत्रालय नै आखेया ऐ जे प्लास्ट इंडिया दी परिकल्पना ज़ीरो वेस्ट पर केन्द्रीत ऐ। इस नमैश दा विषय सार ऐ भारत नैक्स्ट जेहड़ा विकसित भारत ते आत्मनिर्भर भारत आहलियें भावनाएं सवां प्रेरत ऐ।

<><><><><><>

HM JK Visit

केंद्री गृह मंत्री अमित शाह होर अज्जै थ्वा त्रै दिन दे जम्मू-कश्मीर दे दौरै पर आवा'रदे न। उन्दे दौरै दे मददेनजर बादद् सुरक्षाबलें दी तैनाती कीती गई ऐ ते संवेदनशील इलाके च निगरानी बदाई दिती गई ऐ। अधिकारिएं दा आखना ऐ जे खिते च कन्नू बवस्था बनाई रखने लेई सारे लोइचदे इंतजाम कीते गेदे न। आकाशवाणी जम्मू संवाददाता दी रिपोर्ट मूजब गृह मंत्री होर इस दरान सुरक्षा स्थिति दा जायजा लैडन। सियासी नेताएं कन्नै बैठक करडन ते केई सारी विकास परियोजनाएं दी शुरूआत करडन। शाह होर संजा 5 बजे जम्मू पुज्जडन ते फीह लोकभवन च सियासी नेताएं कन्ने मलाटी करडन।

<><><><><><>

IMD

भारतीय मौसम विभाग नै अज्ज उत्तर-प्रदेश- उत्तराखंड- पच्छमी मध्य-प्रदेश- बिहार- हिमाचल प्रदेश- असम ते मेघालय च घनी धुंध पेदी रौहने दे असार दस्से न। मैहकमे दा आखना ऐ जे अज्ज ते कल जम्मू-कश्मीर- लद्दाख- हिमाचल प्रदेश च किश टांवी-टांवी थाहरें बरखा ते बर्फबारी होई सकदी ऐ।

<><><><><><>

JK Encounter

सुरक्षाबलें किशतवाड़ जिले च इक टाकरे दौरान इक आतंकवादी दा सफाया करी दिता ऐ। व्हाइट नाइट कोर नै सोशल मीडिया दी इक पोस्ट "एक्स" पर दस्सेया जे आप्रेशन Trashi-I आतंकवादियें दे खात्में लेई चलाया जा'रदा ऐ ते इक आतंकवादी मारेया गया ऐ। साहडे संवाददाता नै जानकारी दिती ऐ जे सुरक्षाबलें दी सांझी टीम आस्सेया किशतवाड़ जिले दे छात्रु इलाके च इक सांझी कारवाई कीती गई। सुरक्षाबलें इलाके दी घेराबंदी करियें तपाशी अभियान चलाया- जेदे मगरा एह टाकरा भखी पेया। इस्सै टाकरे च इक आतंकवादी मारेया गया।

<><><><><><>